



Siri Walt sin viseta en in camp da fugitivs a Nord-Ubangi.

## Da cuminonza a Ruschein cun in'ambassadura

■ (cp) **Siri Walt ei dapi igl onn 2016 ambassadura svizra en la Republica Democratica dil Congo. Gia avon ha ella luvrau el survetsch diplomatic en differents marcaus africans. G'emprem ha ella fatg in stage a Cairo, pli tard ei ella stada quater onns a Nairobi e lu quater onns a Tunis.** Ed ella passenta meinsvart sias vacanzas a Ruschein. Quella mischeida da local e global ha intima la grupp d'interess «da cuminonza a Ruschein – la sera dils treis» dad envidar l'ambassadura ad ina dallas sis seras dad uonn. Ed ei dat quella gada ina sera per tudestg: mesjamna, ils 3 d'avrel allas 20.15 en casa da scola Crestas.

Naschida ei *Siri Walt* igl onn 1967 en Norvegia, carschida si eis ella en la Val dil Rein songagliesa e studegiau ha ella all'universidad da Berna filologia classica e historia. Cun 30 onns, suenter haver acquistau il tetel da docter, eis ella entrada el survetsch diplomatic dalla Confederaziun. Ella vegn a raquintar pertgei ch'ella ha tscharniu quella via professiunala. Ed era sch'ella vegn a restar diplom-

atica e buca tradir gest tut quei ch'ina ambassadura ha da far, in sguard en siu mintgagi professional african vegn ella franc a possibilitar. Il territori, el qual ella ha da representar ils interess dalla Svizra, ei fetg gronds e cumpeggia buca mo la Republica Democratica dil Congo cun la capitala Kinshasa, mobein era la Republica Congo cun la capitala Brazzaville ed il Gabun. Sin la surfatscha totala da quella treis tiaras vess la Svizra plaz varga 70 gadas. Tgei ha ella empriu per la veta a Kinshasa, nua ch'ella viva cun siu um e siu fegl, tgei plai leu ad ella e tgei midass ella sch'ella savess? Damondas sin damondas che gidan ad arver egl ed ureglias per in auter mund. Mo secapescha che Siri Walt vegn era a raquintar la sera dils treis pertgei ch'ella passenta meinsvart sias vacanzas a Ruschein e cun tgei egl ch'ella mira sin nies mund. Beinvegnidas ein sco adina era persunas d'ordeifer, l'entrada ei gratuita.

«L'ambassadura Siri Walt», mesjamna, ils 3 d'avrel 2019 allas 20.15, casa da scola Crestas, Ruschein. Dapli sin [www.dacuminonza.ch](http://www.dacuminonza.ch)